



SIRI MENGENAL MALAYSIA



# Kuala Lumpur Bandar Raya Bercahaya

*SHAHIDAH SULAIMAN*

Almarhum

PENERBIT SETIAMAS

Petaling Jaya

PENERBIT SETIAMAS  
NO. 14, JALAN SS4/17  
47301 PETALING JAYA  
SELANGOR DARUL EHSAN  
TEL: 03-7774678/7762300  
FAX: 03-7762300

©PENERBIT SETIAMAS  
Cetakan Pertama 1997

AMARAN ATAS HAKCIPTA

Semua hak terpelihara. Sebarang bahagian dalam buku ini tidak boleh diterbitkan semula atau dipindahkan dalam sebarang bentuk atau dengan sebarang cara, baik dengan cara elektronik, mekanik, penggambaran ataupun sebaliknya tanpa izin yang bertulis terlebih dahulu daripada pihak Penerbit.

W 899516

- 1 DEC 1997

Perpustakaan Negara  
Malaysia

Dicetak oleh: Percetakan Advanco Sdn. Bhd.  
23, Jalan Segambut Selatan, 51200 Kuala Lumpur  
(Company No. 45169-K)  
Tel: 03-6269211 & 6270699 Fax: 03-6270761

459 5116

SHN


## **Prakata**

‘Tak kenal maka tak cinta’. Demikianlah kata-kata yang menggambarkan sikap penduduk Malaysia daripada aspek pelancongan. Akibatnya ramai penduduk Malaysia yang melancong ke luar negara dan mengakibatkan pengaliran keluar wang.

Yang anehnya mereka yang melancong ke luar negara belum pernah melancong ke seluruh negara. Itulah sebabnya baru-baru ini kerajaan mempromosi Pelancongan Domestik atau di dalam negara.

Siri Mengenal Malaysia ini boleh membantu memperkenal Malaysia terutama pada peringkat rendah. Sesungguhnya banyak perkara yang menarik di Malaysia yang patut dilihat oleh semua rakyat negara ini.

Penerbit.



# **KUALA LUMPUR BANDAR RAYA BERCAHAYA**

## **Pengenalan**

Bandar Raya Kuala Lumpur merupakan ibu negara Malaysia yang dahulunya ibu negeri Selangor. Kuala Lumpur juga menjadi pusat pentadbiran negara dengan menempatkan semua jentera pentadbiran seperti kementerian-kementerian, jabatan-jabatan kerajaan dan institusi-institusi yang penting.

## **Kuala Lumpur Banda Raya Taman**

Kuala Lumpur juga menjadi pusat perkembangan ilmu, kebudayaan, ekonomi dan pelancongan. Bangunan-bangunan pencakar langit berdiri di



*Bandar Raya Kuala Lumpur*

tengah-tengah bandar raya Kuala Lumpur sebagai lambang kemegahan negara Malaysia yang terus membangun. Jalan raya dan lebuh raya yang menghubungi Kuala Lumpur dengan kawasan-kawasan lain, bersimpang siur dengan kenderaan yang tidak putus-putus.

Kesesakan lalu lintas adalah menjadi perkara biasa kepada penduduk Kuala Lumpur yang melebihi sejuta orang. Jalan raya sentiasa dilebarkan dan diperbaiki untuk menampung kesesakan ini.

Semua kedutaan negara-negara yang mempunyai hubungan diplomatik dengan Malaysia juga terletak di Kuala Lumpur. Masyarakat antarabangsa lebih mengenali Kuala Lumpur daripada negeri-negeri lain di Malaysia kerana Kuala Lumpur sering menjadi tuan rumah bagi persidangan-persidangan antarabangsa, seminar, pertandingan sukan, tilawah Al-Quran dan pesta-pesta pelancongan.

Kegiatan ekonomi Kuala Lumpur yang paling utama adalah perdagangan. Hampir kesemua pusat pentadbiran syarikat besar negara ini dan juga negara-negara asing terletak di Kuala Lumpur. Gedung-gedung perniagaan yang besar dan kecil

# MEMBELI-BELAH UTAMA



12-27 OKTOBER '96

Kuala Lumpur pusat perdagangan

bertaburan di sekitar Kuala Lumpur. Gedung-gedung ini saling berlumba-lumba untuk mendapatkan keuntungan yang besar di negara Malaysia yang tercinta ini.

Pemandangan di sekitar bandar raya Kuala Lumpur sungguh menarik. Bangunan-bangunan moden teguh berdiri di tengah-tengah bandar raya ini seperti Menara Mayban, Menara Daya Bumi dan sebagainya. Bertambah hebat lagi dengan menara-menara yang dalam pembinaan seperti Menara Kuala Lumpur dan Kuala Lumpur City Centre, bangunan yang tertinggi di dunia.

Kawasan-kawasan taman rekreasi pula diwujudkan untuk mengatasi kesibukan dengan suasana yang lebih damai.

Terdapat banyak tempat menarik yang boleh dikunjungi. Jika hendak dibandingkan dengan keluasan Kuala Lumpur yang hanya 243. 63 kilometer persegi, ternyata kawasan sekecil ini mempunyai bilangan tempat-tempat menarik yang paling banyak.

Penduduk Kuala Lumpur terdiri daripada berbilang kaum dan agama. Kebanyakan mereka berhijrah dari negeri-negeri lain di Malaysia kerana merebut peluang pekerjaan atau perniagaan.

Berbagai-bagai lapisan masyarakat yang menghuni Kuala Lumpur terdiri daripada golongan buruh hingga ke golongan korporat. Matlamat mereka adalah sama untuk mencari masa depan yang gemilang di kota raya lain.

Pada masa Perang Dunia Kedua meletus pada tahun 1941, Kuala Lumpur terletak di bawah pentadbiran Jepun. Selepas perang tersebut Kuala Lumpur diserahkan semula kepada Inggeris. Lembaga Bandar raya Kuala Lumpur dan ketua-ketua pentadbiran dipegang oleh orang-orang kenamaan negeri ini.

Lembaga ini mempunyai tugas untuk membuktikan semua pentadbiran bandar berjalan dengan teratur. Bagaimanapun pengurusan dan pentadbiran Kuala Lumpur ketika itu adalah mengikut corak dan arah politik Inggeris. Pihak penjajah Inggeris mahu menjadikan Tanah Melayu sebagai sebuah negeri yang dinamakan Kesatuan Melayu atau lebih dikenali sebagai Malayan Union.

Sebagai ibu negeri dan pusat pentadbiran Negeri-Negeri Melayu Bersekutu, Kuala Lumpur berkembang dalam semua bidang terutama bidang Pendidikan, Kesihatan, Kebajikan dan Sosial.

Apabila negara kita mencapai kemerdekaan dan seterusnya Malaysia ditubuhkan, kemajuan yang dicapai oleh Kuala Lumpur adalah amat menakjubkan.

Pada 1 Februari 1972, Kuala Lumpur telah diiktiraf sebagai Bandar Raya. Bandar Raya Kuala Lumpur telah diperluaskan kawasannya daripada 93. 4 km persegi kepada 243. 63 km persegi.

## **Sejarah Kuala Lumpur**

Mengimbau sejarah Kuala Lumpur pada hakikatnya, sejarah Kuala Lumpur termasuk dalam sejarah Negeri Selangor. Kuala Lumpur telah diduduki orang pada awal abad kesembilan belas. Ketika itu kawasan persekitaran perlombongan bijih timah.

Menurut para pengkaji sejarah, orang yang mula-mula memasuki Kuala Lumpur ialah Raja Abdullah bin Raja Jaafar. Selain dari Raja Abdullah, tokoh-tokoh pelombong bijih timah ketika itu ialah Sultan Puasa dan Raja Jumaat, iaitu abang kepada Raja Abdullah.




*Antara bangunan tertua*

Raja Abdullah dikatakan membawa rombongan seramai 87 orang Cina dari Lukut lalu mendarat di pertemuan Sungai Klang dan Sungai Gombak. Tempat tersebut dinamakan Kuala Lumpur. Rombongan itu adalah rombongan yang pertama datang ke Kuala Lumpur dan membuka perusahaan melombong bijih timah di Ampang.

Akan tetapi seramai 70 orang daripada pelombong tersebut telah mati akibat diserang penyakit .

Bagi meneruskan perusahaan melombong di Kuala Lumpur, Abang Raja Abdullah iaitu Raja Jumaat telah menghantar 150 orang Cina. Setelah menghadapi berbagai-bagai kesulitan , akhirnya dapat juga mereka mengeksport bijih timah dari Ampang. Semakin lama semakin ramailah pelombong Cina yang datang ke Kuala Lumpur dan kemudian membuka beberapa petempatan.

Sultan Puasa adalah salah seorang ahli perniagaan yang bersahabat baik dengan dua orang Cina yang bernama Hiu Siew dan Ah Sze. Hiu Siew telah dilantik menjadi kapitan Cina yang pertama dengan sokongan orang Melayu dan pelombong-pelombong Cina.



*Stesen Kereta Api*

Apabila beliau meninggal dunia pada tahun 1861, orang ramai mencalonkan Ah Sze menjadi kapitan tetapi beliau telah menolak perlantikan itu kerana hendak menumpukan sepenuh perhatian kepada perniagaannya. Dengan itu orang ramai telah melantik Liu Ngim Kong menjadi Kapitan Cina yang kedua.

Kapitan Liu Ngim Kong adalah sahabat karib kepada Yap Ah Loy. Kapitan Liu mengajak Yap Ah Loy tinggal di Kuala Lumpur. Dengan ini dapatlah dikatakan bahawa kenyataan yang mengatakan bahawa Yap Ah Loy adalah tokoh yang mula membuka Kuala Lumpur kurang tepat (sebagaimana yang disebut oleh ahli sejarah barat).

Oleh kerana Kapitan Liu selalu sakit, Ah Sze mencadangkan supaya Yap Ah Loy dilantik menggantikan Kapitan Liu. Pendapatnya disokong oleh Sultan Puasa lalu

Mereka pun menghadap Sultan Abdul Samad untuk mempertimbangkan cadangan tersebut.

Ah Sze memberi alasan bahawa orang Cina di Kuala Lumpur akan menyebelahi Sultan dan Raja Abdullah yang ketika itu berselisih faham dengan Raja Mahadi. Sultan Abdul Samad pun bersetuju dengan cadangan itu.

Apabila Kapitan Liu meninggal dunia pada bulan setember 1868, Yap Ah Loy pun dilantik menjadi Kapitan Cina yang ketiga.

Dalam sejarah pergolakan Negeri Selangor, Yap Ah Loy menyebelahi Tengku Kudin dan Tengku Kudin pula mendapat pertolongan daripada pihak Inggeris. Perang saudara yang berlarutan di Selangor telah menyebabkan campur tangan Inggeris

Kuala Lumpur telah banyak binasa kerana perang saudara tersebut. Yap Ah Loy orang yang bertanggungjawab membangunkan semula Kuala Lumpur selepas perang saudara tersebut berakhir. Inggeris juga telah mengukuhkan kuasanya di Selangor selepas peperangan itu.

Kemudian Yap Ah Loy telah mendapat kuasa penuh memerintah Kuala Lumpur. Beliau merupakan seorang yang sangat kaya sehingga dapat mengekalkan keamanan Kuala Lumpur. Dengankekayaan Yap Ah Loy telah mendirikan sebuah rumah sakit untuk pekerja-pekerja lombong dan berusaha membuka sebuah sekolah.

Kekayaan Yap Ah Loy ketika itu amat luar biasa. Dua pertiga tanah di Kuala Lumpur dimiliki

olehnya. Beliau mempunyai ladang ubi seluas 4860 hektar di Kuala Lumpur. Ketika menyambut lawatan Frederik Weld iaitu Gabenor Negeri Selat pada tahun 1879, Yap Ah Loy telah mendirikan sebuah dewan dan mempersesembahkan wayang khas dari China sebagai memeriahkan sambutan lawatan itu.

Sebelum Kuala Lumpur dijadikan ibu negeri Selangor, pada tahun 1878, lima orang polis berpangkat kopral ditempatkan di rumah Kapitan Cina.

Kedatangan British untuk mentadbir Kuala Lumpur sebagai ibu negeri Selangor, merupakan permulaan pemerintahan moden bagi Kuala Lumpur.

Mulai saat itu Yap Ah Loy tidak lagi memegang kuasa keamanan di Kuala Lumpur. Kuasa ini diambil oleh Jabatan Polis Selangor. Pentadbiran Kuala Lumpur telah mengatur semua rancangan pembinaan dan pentadbiran yang lebih teratur di Kuala Lumpur.

Rumah sakit yang sepurna telah didirikan serta perkhidmatan awam diwujudkan bagi kemudahan orang ramai.



*Bangunan Sultan Abdul Samad*


Kuala Lumpur telah berwajah baru apabila kemudahan-kemudahan asas seperti jalan raya, jalan kereta api, bekalan air paip, tenaga elektrik dan lain-lain disediakan.

Sesuai dengan kedudukan di tengah-tengah empat buah negeri iaitu Selangor, Negeri Sembilan, Pahang dan Perak, pada tahun 1896 Kuala Lumpur telah dijadikan Ibu Pejabat Ketua Residen Inggeris bagi Negeri-Negeri Melayu Bersekutu.

Ketika itu Frank Swettenham adalah Ketua Residen Inggeris dan beliau telah meletak batu asas pusat pentadbiran Negeri-Negeri Melayu Bersekutu di Kuala Lumpur.

### **Tempat-tempat Menarik di Kuala Lumpur**

Kuala Lumpur bandar raya dan ibu negara yang penting. Bandar raya ini dipenuhi dengan pelbagai tempat yang menarik. Pada waktu malam pula bandar raya Kuala Lumpur disinari lampu-lampu yang bergemar�apan dan mempersonakan mata yang memandang.



## Bangunan-bangunan Kebanggaan

Planetarium Negara adalah satu-satunya kebanggaan negara kita daripada segi teknologi angkasa lepas. Planetarium yang berharga 4.5 juta ini berada di bawah pentadbiran Bahagian Kajian Sains Angkasa (BAKSA). Kedua-dua teknologi moden dan Islam dalam bidang sains angkasa dipamerkan di sini. Tempat itu mudah dikunjungi kerana terletak tidak jauh dari pusat kota raya.

Terdapat juga dua memorial yang menjadi tempat untuk kita mengenang atau memperingati orang yang pernah berjasa kepada negara. Memorial Tunku Abdul Rahman menempatkan bahan-bahan bersejarah tentang diri beliau sebagai pejuang kemerdekaan dan Perdana Menteri Pertama dan kemerdekaan negara.

Memorial Tun Abdul Razak dibina untuk mengenang atau memperingati segala jasa yang pernah diberikan kepada rakyat dan negara ini terutama ketika beliau menjadi Pedana Menteri Malaysia yang kedua.

Bangunan Sultan Abdul Samad juga merupakan kebanggaan Malaysia. Bangunan ini siap


pada tahun 1897 yang dijadikan bangunan pusat pentadbiran kerajaan Selangor. Sekarang bangunan ini dijadikan Mahkamah Agung dan Mahkamah Tinggi.

Masjid Negara juga tidak kurang menariknya. Bangunan masjid ini dihiasi oleh kesenian kaligrafi Islam. Bumbung masjid berbentuk kubah yang melambangkan aspirasi dan kebebasan rakyat negara ini.

Tugu Peringatan Negara juga adalah mercu tanda di negara kita. Tugu ini dibina untuk memperingati pahlawan-pahlawan yang gugur semasa menentang ancaman komunis selama 12 tahun pada zaman darurat 1948-1960. Tugu ini dibina di kawasan Taman Tasik Perdana berhampiran dengan Bangunan Parlimen lambang Demokrasi negara ini. Tugu ini terdiri daripada tujuh buah patung pahlawan yang dibuat daripada gangsa.

Menara Kuala Lumpur adalah mercu tanda yang menjadi kebanggaan negara kita. Menara yang letaknya di Bukit Nanas ini adalah yang ketiga tingginya di dunia. Terdapat ciri-ciri keislaman pada bentuk dan rekaan bangunan ini. Menara ini akan dibuka kepada orang awam untuk

*Anjara Pusat-Pusat Membeli-Belah*



dikunjungi pada akhir tahun 1996.

Kompleks Penerangan Pelancong Malaysia (MATIC) juga merupakan tempat yang sesuai dikunjungi terutama kepada pelancong-pelancong kerana di sini mereka boleh melihat pemeran, mendapatkan maklumat dan hal-hal berkaitan dengan negara kita. Kompleks ini terletak di Jalan Ampang.

Tidak dinafikan juga, di Bandar Raya Kuala Lumpur terdapat banyak pusat-pusat membeli-belah. Pusat-pusat membeli belah ini kebiasaannya beroperasi selama 12 jam setiap hari iaitu daripada jam 10.00 pagi hingga jam 10.00 malam.

Pada waktu malam Bandar Raya Kuala Lumpur begitu indah dan menarik kerana dihiasi cahaya lampu daripada pusat-pusat membeli belah, bangunan-bangunan pentadbiran dan jalan-jalan raya.

Central Market atau Pasar Seni adalah tempat yang memasarkan barang-barangan dan hasil-hasil seni dari negara kita. Tempat ini dikenali sebagai pusat kebudayaan dan kesenian. Di sini jugaalah terkumpulnya pelukis-pelukis tempatan yang memamerkan karya-karya mereka.

Selain itu terdapat juga beberapa kompleks membeli-belah yang terkenal di negara kita. Antaranya Putera Place, Sogo, Kota Raya, Lot 10, Plaza Yow Chuan, Pertama Kompleks dan The Weld.


Pasar malam juga mendapat tumpuan orang ramai dan merupakan satu budaya bagi masyarakat di seluruh negara kita. Pasar ini hanya berlangsung pada waktu malam sahaja dan sekali atau dua kali seminggu bagi sesetengah tempat.

Di sini kita dapat membeli berbagai-bagai barang termasuk barang makanan pakaian dan keperluan yang dijual dengan harga yang murah. Contohnya di pusat bandar Kuala Lumpur pasar malam ini diadakan di sepanjang Jalan Tuanku Abdul Rahman setiap hari Sabtu.

Bandar Raya Kuala Lumpur juga terkenal sebagai pusat kebudayaan. Tarian-tarian Malaysia banyak dipersembahkan oleh badan-badan kesenian di negara kita. Tarian-tarian ini adalah merujuk kepada tarian bangsa dan etnik yang ada di negara kita.

Kuala Lumpur yang merupakan ibu negara kita sudah tentu menjadi pusat tumpuan utama

*Dataran Merdeka Tempat Persembahan*



memperkenalkan kebudayaan negara kita terutama kepada masyarakat luar.

Tarian adalah merupakan tunjang utama bagi pelbagai bentuk kesenian yang terdapat di Malaysia. Pesembahan amat unik dan mempesonakan. Tarian dipersembahkan dalam berbagai-bagi bentuk dan gaya. Pergerakan yang lemah gemalai diiringi nyanyian dan muzik menggambarkan betapa negara kaya dengan warisan kesenian.

Tarian-tarian Malaysia dipersembahkan untuk berbagai-bagi acara antaranya upacara perkahwinan, pesta menuai dan majlis-majlis keraian peringkat negeri. Tarian ini dinikmati oleh golongan tua dan muda.

Tarian Asyik adalah satu tarian klasik (daerah) Kelantan dan dipersembahkan di istana oleh gadis-gadis remaja pada hari upacara tertentu dan hari-hari keramaian. Penari-penari terdiri daripada dayang-dayang istana. Tarian Asyik telah menarik minat masyarakat seluruhnya.

Pakaian penari adalah serupa dengan tarian Mak Yong iaitu berbaju pendek (warna merah), kain sarung dan sehelai kain panjang digantung



pada bahu dan dilepaskan hingga kepinggang. Pada bahagian pinggang, penari memakai pending(sejenis tali pinggang) dan puteri/asyik dimestikan memakai caggar pada sanggulnya.

Pada zaman dahulu Tarian Asyik ditarikan pada hari perkahwinan, iaitu malam berinai dan malam berinai besar di istana. Hari ini Tarian Asyik dipersembahkan pada hari-hari temasya negeri dan negara.

Bagi kaum Cina antara tarian yang terkenal ialah tarian menyambut Tahun Baru. Kegembiraan menyambut tahun baru digambarkan dalam tarian ini. Tarian ini adalah menggambarkan persiapan untuk Tahun Baru secara besar-besaran. Tarian ini juga menunjukkan gadis-gadis menghias diri untuk menyambut perayaan ini.

Bagi masyarakat India. Tarian Klasik India adalah antara tarian yang turut dipersembahkan di bandar raya Kuala Lumpur. Tarian ini adalah gabungan antara unsur pemujaan dan luahan perasaan yang mendalam dalam diri seseorang manusia.

Asalnya tarian India ini dari pertengahan zaman purbakala. Tarian India yang bersifat keagamaan



Batu Caves, Selangor

ini dikaitkan juga dengan tarian tradisi yang dipersembahkan di kuil. Terdapat 'devadasis', yang dianggap suruhan tuhan, yang manarikan sejenis tarian memuja dikenali sebagai Bharata Natyam Mahari pengasas odisi tradisional dan Maribi Manipuri juga berasal dari kuil.

Kaum Bumiputera dari Sabah dan Sarawak pula sememangnya terkenal dengan pelbagai jenis tarian yang melambangkan identiti Bumi-putera di Sabah. Tarian Ngajat adalah tarian yang sangat popular di kalangan Orang Hulu di Sarawak.

Tarian Ngajat ini adalah tarian orang Iban. Bagi mereka tarian ini asalnya adalah untuk melatih orang Iban berperang. Latihan ini adalah latihan rohani dan jasmani pada zaman dahulu ditarikkan selepas mereka kembali dari perang. Penari-penari akan memakai kain merah yang diikat pada bahagian pinggang hingga ke paras lutut. Penari juga memakai topi yang dihias dengan bulu-bulu burung. Pada tubuhnya dipakai sejenis baju yang dibuat dari bulu-bulu burung tetapi tidak dijahit kiri dan kanannya.

Semasatarian ini dilakukan lagu iringan dibunyikan dari alat-alat seperti gong besar dan kecil, gendang, tawak, bebundai dan engkurumong.

Kazum Bumi putera Di Suhuh



## **Perayaan-perayaan di Malaysia**

Bandar Raya Kuala Lumpur juga merupakan tempat tumpuan kepada para pelancong untuk melihat suasana kemeriahinan perayaan-perayaan di negara kita. Oleh kerana kita mempunyai penduduk yang berbilang kaum terdapat banyak perayaan yang dirayakan oleh penduduk Malaysia.

Sememangnya Malaysia dikenali sebagai negara perayaan sepanjang tahun. Setiap kali perayaan-perayaan tertentu, sebagai contoh Hari Raya, Tahun Baru Cina, Hari Gawai di Sabah, Thaipusam di Selangor, Perak, Pulau Pinang dan Negeri Sembilan, Israk dan Mikraj di Kelantan dan lain-lain dijadikan hari cuti umum.

Hari Raya Puasa (Aidilfitri) adalah perayaan yang menarik di kalangan umat Islam di negara kita. Sebelum menyambut Hari Raya Puasa umat Islam akan berpuasa pada bulan Ramadan. Setelah tamat sebulan berpuasa, umat Islam akan bergembira menyambut Hari Raya Puasa. Hari Raya Puasa jatuh pada 1 Syawal setiap tahun Hijrah.

*Antara Perayaan Perayaan di Malaysia*



Suasana kemeriahinan jelas tergambar di persekitaran bandar raya Kuala Lumpur terutama pada waktu malam. Di tepi-tepi jalan raya dihiasi dengan pelbagai cahaya dan lampu-lampu yang beraneka warna yang melambangkan suasana kemeriahinan hari raya.

Begitu juga dengan suasana pada waktu malam hari raya yang penuh dengan keindahan cahaya bunga api di persekitaran dan memeriahkan suasana malam hari raya. Pada waktu ini kanak-kanak dan remaja adalah golongan yang paling gembira semasa menyambut Hari Raya Puasa ini.

Bagi kaum Cina kemeriahinan perayaan bagi mereka ialah sewaktu menyambut Tahun Baru Cina. Perayaan ini disambut sebagai meraikan kedatangan tahun baru berdasarkan kalender masyarakat Cina. Perayaan ini biasanya disambut selama 15 hari.

Thaipusam pula adalah perayaan yang popular di kalangan masyarakat yang menganut agama Hindu. Perayaan ini jatuh pada masa bulan purnama dalam bulan Tamil Thai.

Di Semenanjung Malaysia khasnya di sebelah Pantai Barat, perayaan ini disambut dengan meriah sekali. Semasa menyambut perayaan ini beribu-ribu penganut agama Hindu berkumpul di kuil-kuil tertentu untuk bersembahyang.

## Kesimpulan

Negara kita Malaysia telah berkembang pesat. Kuala Lumpur yang merupakan ibu negara Malaysia adalah merupakan pusat pembangunan, pentadbiran, kewangan dan kebudayaan.

Oleh kerana kemajuan yang dialami menyebabkan bandar raya ini terkenal di seluruh dunia dan setanding dengan bandar-bandar raya lain di dunia.

Sebagai bandar raya yang dikenali sebagai Bandar Raya Bercahaya kerana keindahan suasana malamnya yang disirami dengan pelbagai lampu yang berwarna-warni, bandar raya ini terkenal dengan sifat kesopanan dan tatasusila ketimuran yang merupakan indititi masyarakat Malaysia.

Walau bagaimanapun kepesatan dan keindahan Kuala Lumpur ini perlu dijaga agar anasiran-asir yang tidak baik seperti melepak, perlakuan yang tidak senonoh, terikut-ikut dengan budaya bebas masyarakat barat tidak berleluasa di kalangan masyarakat kita.

Adalah diharapkan Bandar Raya Kuala Lumpur ini terus berdaya maju di samping mengekalkan ciri-ciri budaya yang penuh dengan peradaban dan kesopanan yang luhur dan terpuji.

